



Inatsisartunut ilaasortaq, Mette A-Hammeken, Naleraq

## Ittoqqortoormiit timmisartuunneqartarnerat pillugu § 37 naapertorlugu apeqquteqaammut 2021-048-mut akissut

03-06-2021  
Sagsnr.: 2021 - 10299  
ID. nr. 64705853

Asasara Mette A-Hammeken

Inatsisartut Suleriaasianni § 37 naapertorlugu Ittoqqortoormiit timmisartuunneqartarnerat pillugu Naalakkersuisunut apeqquteqarputit. Apeqqutitit uannit akineqartussatut innersuunneqarput. Apeqqutitit matumap kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

### Apeqqut 1: Ittoqqortoormiunniit aamma Ittoqqortoormiunut timmisartukkut angalaneq naatsorsuusionneqarniarpa?

*Akissut:* Nerlerit Inaannut suluusalimmik timmisartuussisoqartarneratigut, Ittoqqortoormiinnullu qulimiguulimmik timmisartuussisoqartarneratigut marlunnik periutsimik tunngavilimmik Ittoqqortoormiit timmisartuunneqartarpoq. Tamanna tunngavigalugu Ittoqqortoormiit qulimiguulimmik timmisartuunneqartarneranut apeqquteqaat tunngassuteqartutut paasineqassaaq.

Air Greenlandip paasissutissiissutigaa, kiffartuussinissami isumaqatigiissut naapertorlugu Ittoqqortoormiini timmisartuussinermi 2019-imi aallarnerit, minnerillu 386-iusimasut. 2020-mi 261-iusimapput. Ittoqqortoormiit Nerlerit Inaatalu akornanni angallavimmi 2019-imi taamaatitsinerit 214-iusimapput, 2020-milu 330-usimallutik. Nerlerit Inaata Ittoqqortoormiillu akornanni angallavimmi 2019-imi taamaatitsinerit 433-usimapput, 2020-milu 660-iusimallutik. Air Greenlandip paasissutissiissutigaa, taamaatitsinernit taakkunanga 60-it missaanniittut angalasussaqaqnginneranik patsiseqarsimasut, sinnerilu silamik patsiseqartumik taamaatitsinerusimasut.

#### a. Ukiumut qassit angalasarpat, tikittut aallartullu?

*Akissut:* Tamatuma saniatigut Ittoqqortoormiit Nerlerit Inaatalu akornanni ukiuni kingullerni angalasut amerlassusaat Air Greenlandip tulliuttutut paasissutissiissutigai:

Angalasut amerlassusaat	2019	2020
Ittoqqortoormiit – Nerlerit Inaat	662	318
Nerlerit Inaat - Ittoqqortoormiit	631	350
<b>Angalasut amerlassusaat katillugit</b>	<b>1293</b>	<b>668</b>

Siuliani allassimasut tunngavigalugit tapiissutissat naatsorsornerini, siumut utimullu angalanermut inummut ataatsimut 2022-mi tapiissutit 25.000 koruunit missaanniipput, kiffartuussinissamilu isumaqatigiissutip atuuffiani ukiuni ilivitsuusuni 2022 siulliulluni.

### **Apeqqu 2: Ittoqqortoormiiniit aamma Ittoqqortoormiunut angalaneq qanoq akikinnermut nalimmassarneqarsinnaava?**

*Akissut:* Ittoqqortoormiit timmisartuunneqartarnissaa pillugu kiffartuussinissamik isumaqatigiissutit ukiuni qulini atuuttussat, 2020-mi isumaqatigiissutigineqarput. Akigititat pitsaassuserlu eqqarsaatigigaanni, kiffartuussinissami isumaqatigiissutit sivisunerusumik atuunnissaatigut Naalakkersuisut isumaqatiginninniarnermi angusarissarput. Billetsinut annerpaamik akigititassanut tunngavissat, kiffartuussinissami isumaqatigiissutini aalajangersarneqarput. Kiffartuussinissami isumaqatigiissutinut atuuttunut tapiliussatut isumaqatigiissusiornikkut, billetsinut annerpaamik akigititassat Namminersorlutik Oqartussat appartissinnaavaat.

Ittoqqortoormiini mittarfiliortoqassappat, assartuussinermi aningaasartuutit ilaasa appartinneqarnerisigut imaluunniit tamakkiisumik aamma/imaluunniit ilaannakortumik atorunnaarsinneqarnerisigut billetsinut akigititat appartinneqarsinnaassapput. Ittoqqortoormiini mittarfik nalunaarusiami "Ittoqqortoormiini nutaamik mittarfiliornissamut periarfissat pillugit allaatigisaq"-mi sammineqarpoq, taannalu Inatsisartut 2020-mi ukiakkut ataatsimiinnerini imm. 27-mi saqqummiunneqarluni.

### **Apeqqu 3: Ilimanaateqarpa billetp akia appaaffigineqarsinnaasoq?**

*Akissut:* Apeqqu 2-mut akissut innersuussutigineqarpoq.

### **Apeqqu 4: Angalaneq billetpitigut appaaffigineqassappat qanoq kinguneqarsinnaava?**

*Akissut:* Kiffartuussinissami isumaqatigiissutinut atuuttunut tapiliussatut isumaqatigiissusiornikkut billetsinut akigititat appartinneqarsinnaapput, taamaassappallu nunatta karsianit aningaasartuutit assinginik qaffanneqassallutik.

### **Apeqqu 5: Billepsi siumut utimullu akii appassappata qaqugu ilimarnarsinnaava atuutilissasut?**

*Akissut:* Billetsinut akigititat kiffartuussinissami isumaqatigiissutitigut aalajangersagaammata, kiffartuussinissami nutaanik isumaqatigiissuteqarnikkut imaluunniit tapiliussatut isumaqatigiissusiornikkut billetsinut akigititat appartinneqarsinnaassasut naatsorsuutigineqassaaq. Ittoqqortoormiunut kiffartuussinissami isumaqatigiissut 2030-mi decembarip 31-ata tungaanut atuuppoq.

### **Apeqqu 6: Avinngarusimasut eqqarsaatigalugit billitsi akikillisinnissaannut qanoq anguneqarsinnaava?**

*Akissut:* Isorliunerusunut billetsinut akigititat appartinneqarnissaat politikikkut kissaatigineqassappat, kiffartuussinissami isumaqatigiissutinut tapiissutit qaffanneqartariaqassapput, taamaallunilu nunatta karsianit aningaasartuutit assinginik

qaffanneqassallutik.

Neriuppunga apequteqaatitit qulaani allaqqasuni akineqartut.

Inussiarnersumik inuulluaqqusillunga

  
Naaja H. Nathanielsen